

現代生活藝術系列

華嚴經疏論纂要 8

— 世主妙嚴品之七

華藏淨宗學會印贈

大方廣佛華嚴經疏論纂要卷第八

五臺山清涼國師澄觀疏鈔

太原方山長者李通玄 論

閩鼓山私淑比丘道需纂要

世王妙嚴品第一 之七

○自下第二。有八段。明八部四王衆。初四段。皆初
一是天義。如前釋。今初乾闥婆王。長行十法。

復次持國乾闥婆王。得自在方便。攝一切衆生。解脫
門。樹光乾闥婆王。得普見一切功德。莊嚴解脫門。淨
目乾闥婆王。得永斷一切衆生憂苦。出生歡喜。藏解

脫門華冠乾闥婆王得永斷一切衆生邪見惑解脫
門喜步普音乾闥婆王得如雲廣布普蔭澤一切衆
生解脫門樂搖動美目乾闥婆王得現廣大妙好身
令一切獲安樂解脫門妙音師子幢乾闥婆王得普
散十方一切大名稱寶解脫門普放寶光明乾闥婆
王得現一切大歡喜光明清淨身解脫門金剛樹華
幢乾闥婆王得普滋榮一切樹令見者歡喜解脫門
普現莊嚴乾闥婆王得善入一切佛境界與衆生安
樂解脫門

疏初一卽東方天王謂攝受折伏逆順多端善巧

應機故名自在。一普見等者。謂令衆生見佛一切
 功德莊嚴。佛一毛而爲利益。一一皆爾。故云普見
 三以慈愍方便除憂。則喜生。憂苦旣如海廣。淡喜
 樂亦難盡名藏。然則世之憂喜生乎利害。利害存
 乎情僞。苦樂存乎吉凶。吉凶存乎愛惡。愛惡盡則
 吉凶苦樂皆亡。情僞息則利害憂喜永斷。如此方
 爲永斷憂苦。喜樂生焉。鈔。愛惡盡下。彰滅吉凶。憂
 爲大喜。無苦。喜所以卽知無憂。無喜。方
 無樂。真樂耳。四永斷等。謂得佛決定智光。則邪惑
 永斷。五謂慈雲普蔭。材與不材皆涼。慧澤廣霑。三
 草一木咸發。慈雲普蔭。材與不材皆涼等者。上句
 依莊子下句依法華。材者可爲棟梁。

成器之木也不材無所堪也莊周行山見伐木者
止其旁而不取周歎曰此木以不材得終其天年
及還至故人家主人將殺鴈豎子曰一能鳴一不
能鳴請奚殺主人曰殺不能鳴者弟子問周曰山
中之木以不材得終天年主人之鴈以不材致成
先生將何處焉周笑對曰將處夫材與不材之間
然材不材之言雖在莊子意亦法華第三云我觀
一切皆皆平等乃至云貴賤上下持戒毀戒威儀
具足及不具足正見邪見利根鈍根等雨法雨而
無懈倦卽材與不材皆涼也言三草者謂小草中
草上草二木謂小樹大樹以人天乘爲小草經云
或處人天轉輪聖王釋梵諸王是小藥草二乘爲
中草經云知無漏法能得涅槃起六神通及得二
明獨處山林常行禪定得緣覺證是中藥草菩薩
爲上草經云求世尊處我當作佛行精進定是上
藥草此通說大乘爲上以大乘登地已上慈陰義
廣復加二樹七地已前小樹經云又諸佛子專心
佛道常行慈悲自知作佛決定無疑是名小樹八
地已上爲大樹經云安在神通轉不退輪度無量
億百千衆生如是菩薩名爲大樹而言咸發者經

云佛平等說。如一味雨隨衆生性。所受不同。如波草木所稟各異等。六現廣等者。現身益物也。稱性普應。故廣大。具相清淨。故妙好。七佛出說法。是大名稱。佛法衆僧俱稱爲寶。令此遠聞。義云普散。八現一切等者。身光普照。塵不能染。見者必歡。智光悅機。惑累不生。又歡喜也。故云大喜。九法水徧滋。菩提實行。行旣樹立。見者必歡。無復二乘。一切皆菩提樹也。十善入等者。一多無礙。名爲佛境。天王智達。故云善入。

爾時持國乾闥婆王。承佛威力。普觀一切乾闥婆衆。而說頌言。

疏偈中亦十。

諸佛境界無量門

一切衆生莫能入

善逝如空性清淨

普爲世間開正道

如來一一毛孔中

功德大海皆充滿

一切世間咸利樂

此樹光王所能見

世間廣大憂苦海

佛能消竭悉無餘

如來慈愍多方便

淨目於此能深解

十方利海無有邊

佛以智光咸照耀

普使滌除邪惡見

此樹華王所入門

佛於往昔無量劫

修習大慈方便行

一切世間咸慰安

此道普音能悟入

疏前五可知。

佛身清淨皆樂見

能生世間無盡樂

解脫因果次第成

美目於斯善開示

疏六中初句現身。次一句。一切獲安樂也。世間即

一切也。無盡樂總顯也。謂佛現於世。足履影覆。若

在人天。現增快樂。若在下苦七日之中。身心安樂

乃至終獲涅槃之樂。故云無盡。鈔足履影覆至身心快樂者涅槃二

十六說。如有怖鴿。至身子影中。猶自戰懼。至佛影

中。坦然快樂。世尊履地去地四指。然當足下。蟲皆

得生天。於如來所種少善。根如食金剛。必至涅槃。次句別示出世因果之

樂。先因後果。先世後出世。皆次第義。又總取偈意。
佛身清淨。是解脫因。生無盡樂。是解脫果。又總取偈意等
者。上別配三句竟。今總取三句。釋因果次第成言。乃有五對因果。一取初句上四字為因。第二句初二字是果。由佛身淨。今眾解脫故。二以第三句初解脫字為因。第二句為果。此是如來作用解脫。今眾生得樂故。上為一對。世無盡樂。又解脫因。能現淨身。又解脫果。又佛身清淨。是樂見因。樂見。即為清淨身果。眾生樂見。是安樂因。無盡安樂。是樂見果。無盡安樂。是淨身因。能現淨業。是無盡果。如是展轉因果。名次第成。

眾生迷惑常流轉

愚癡障蓋極堅密

如來爲說廣大法

師子幢王能演暢

疏七中初二句寶所濟機堅謂難壞密謂無隙間無空處智不得生次句正散寶也

如來普現妙色身

無量差別等衆生

種種方便照世間

普放寶光如是見

疏八中結句應云普放寶光如是見而云妙音譯者之誤妙音屬前師子幢故

大智方便無量門

佛爲羣生普開闡

入勝菩提眞實行

此金剛幢善觀察

疏九中初二句法水普滋次句道樹普榮也又方

便多門。是開權也。入菩提行。是顯實也。種種方便。但爲一乘。是普滋也。

一刹那中百千劫

佛力能現無所動

等以安樂施羣生

此樂莊嚴之解脫

〔疏〕十中初二句佛境也。次句安樂也。佛力能現無所動者。遮妄見也。非促多劫。就一刹那。非展刹那。受於多劫。本相如故。名無所動。隨應度者。佛力令見。

○第二鳩槃荼王長行十法

復次增長鳩槃荼王得滅一切寃害力解脫門。龍王

鳩槃茶王得修習無邊行門海解脫門莊嚴幢鳩槃
茶王得知一切衆生心所樂解脫門饒益行鳩槃茶
王得普成就清淨大光明所作業解脫門可怖畏鳩
槃茶王得開示一切衆生安隱無畏道解脫門妙莊
嚴鳩槃茶王得消竭一切衆生愛欲海解脫門高峯
慧鳩槃茶王得普現諸趣光明雲解脫門勇健臂鳩
槃茶王得普放光明滅如山重障解脫門無邊淨華
眼鳩槃茶王得開示不退轉大悲藏解脫門廣大面
鳩槃茶王得普現諸趣流轉身解脫門

疏初卽南方天王謂內惑外讐皆名冤害安任忍

力竝能伏之。二修習等者。三利之行。趣果曰門。廣難窮。名無邊海。三知其現欲。如應化伏。四普成就等者。鈍識者。現之以通。利智者。示之以法。徧世多劫。名普成就。竝如虛空。故云清淨。俱能照世。卽是光明。三輪化生。是所作業。五世間惑苦。可畏不安。菩提涅槃。安隱無畏。萬行爲其因道。則畏滅果成矣。六消竭等者。愛欲漂流。深廣如海。智日赫照。則妄竭眞明。七謂於諸趣。普現身雲。耀通明等之光也。八普放等者。身智光明。遣除二障。九多劫修悲。究竟滅苦。爲不退轉。悲多方便。故復名藏。爲安。

衆生所以開示。十普現等者。稱性神通。無來去而
流轉

爾時增長鳩槃荼王。承佛威力。普觀一切鳩槃荼衆
而說頌言

成就忍力世導師

爲物修行無量劫

永離世間憍慢惑

是故其身最嚴淨

〔疏〕偈中。初偈通顯。明佛已滅寃。寃之大者。莫越憍
慢。有之則卑陋。滅之則端嚴

佛昔普修諸行海

教化十方無量衆

種種方便利羣生

此解脫門龍王得

佛以大智救衆生

莫不明了知其心

種種自在而調伏

嚴幢見此生歡喜

神通應現如光影

法輪真實同虛空

如是處世無央劫

此饒益王之所證

衆生癡翳常蒙惑

佛光照現安隱道

爲作救護令除苦

可畏能觀此法門

疏次四偈可知。

欲海漂淪具衆苦

智光普照滅無餘

旣除苦已爲說法

此妙莊嚴之所悟

疏六中。初句欲海。欲爲苦本。云具衆苦。次二句消

竭。既欲惡止。當說善行。鈔欲為苦本者。法華云。諸苦所因。貪欲為本。

佛身普應無不見

種種方便化羣生

音如雷震雨法雨

如是法門高慧入

疏七中。初句。普現身雲。次句。明等電光。故云種種。

次句兼明雷雨。雷有二義。一遠震。二發生。謂蟄蟲

發動。草木發萌。圓音之雷。可以思準。鈔次句明等

云。通明無畏。以為電光。謂十通十明十無畏等。皆

稱電光。故云方便。圓音之雷。可以思準者。謂雷震

百里。今周法界。二發生。是標云何為發。耽著禪味

起大功用。是蟄蟲發動。云何為生。令諸衆生善根

生。令生。

清淨光明不唐發 若遇必令消重障

演佛功德無有邊

勇臂能明此深理

爲欲安樂諸衆生

修習大悲無量劫

種種方便除衆苦

如是淨華之所見

神通自在不思議

其身普現徧十方

而於一切無來去

此廣面王心所了

〔疏餘三可知。〕

○第三龍衆十一法

復次毗樓博叉龍王得消滅一切諸龍趣熾然苦解
脫門娑竭羅龍王得一念中轉自龍形示現無量衆
生身解脫門雲音幢龍王得於一切諸有趣中以清

淨音說佛無邊名號海解脫門。燄口龍王得普現無邊佛世界建立差別解脫門。燄龍王得一切衆生瞋癡蓋纏如來慈愍令除滅解脫門。雲幢龍王得開示一切衆生大喜樂福德海解脫門。德叉迦龍王得以清淨救護音滅除一切怖畏解脫門。無邊步龍王得示現一切佛色身及住劫次第解脫門。清淨色速疾龍王得出生一切衆生大愛樂歡喜海解脫門。普行大音龍王得示現一切平等悅意無礙音解脫門。無熱惱龍王得以大悲普覆雲滅一切世間苦解脫門。

〔疏〕準偈及梵本。皆有十。前第一卷中。長行脫第五。

但有十法。今長行十一法。初一卽西方天王法門。及第二。如偈當釋。三與偈文通有六義。一諸趣是化處。二淨音是化具。三佛名是化法。四神通是化本。五衆生是化機。六隨樂是化意。四普現等者。謂一毛普現無邊依正。以毛稱性能廣容故。廣容卽是普徧。故能現之佛。還自任於毛孔所現刹中。能所無雜。依正區分。大小宛然。名建立差別。五靜法云。準梵本。有燄龍王。得一切衆生瞋癡蓋纏。如來慈愍。令除滅解脫門。謂大慈居懷。則三毒俱滅。六開示等者。佛大慈悲。是福德海。二資糧滿。然後得。

故衆生慈福卽是百川。佛毛示現以表同體。既知

同體。自然朝宗。因示悟入。故得大喜樂。鈔自然朝宗者謂百

川趣海。如蕩國歸朝禮。云春見曰朝夏見曰宗。七慈音智俱。故云清淨淨

無貪愛。何畏何憂。八示現等者。謂於身中現身土

也。九觀佛昔行深廣。故愛樂歡喜。海言通二。謂歡

喜。供養。十示現等者。謂爲衆演音。故云示現。音有

四義。一類多。謂一切。二普徧。謂平等。三稱根。清雅。

故云悅意。四一音隨類。故云無礙。無礙卽方便也。

十一謂此無熱龍。任清涼池。出香美水。流注四海。

導引百川。時布慈雲。降澍甘澤。是故能滅諸世間。

苦

爾時毗樓博叉龍王承佛威力。普觀一切諸龍衆已。而說頌言。

汝觀如來法常爾

一切衆生成利益

能以大慈哀愍力

拔彼畏塗淪墜者

疏偈有十一。初中諸龍有四熱惱。名熾然苦。今並有治。一金翅所食苦。初句爲治。以觀佛法同三歸故。二行欲時復本身苦。三鱗甲細蟲苦。並第二句爲治。學佛等利故。四熱砂著身苦。後二句爲治。以不堪蟲癢。熱砂中驥。今大悲哀愍。故能治之。有說

四苦。無鱗甲細蟲。而有風吹寶衣露身之苦。亦以
第二句治之。就龍。且說龍趣。末句約佛。通拔畏塗。
鈔諸龍皆有四種熱惱者。經論不同。然謗佛經說
如阿那婆達多龍王三種過患。皆悉遠離。一者熱
砂不墮其頭。二者不以蛇身行欲。三者無迦樓羅
鳥之畏彼。喻發菩提心。離三界惡。然會之亦同。無
鱗甲細蟲。而有風吹者。由有細蟲。故駭熱砂。此二
則同。其風吹寶衣露身。卽見復本身之恥。所以互
合有開

一切衆生種種別

於一毛端皆不現

神通變化滿世間

娑竭如是觀於佛

疏二。中。此就佛論示現。前約龍云能轉。又前一念
時促。今一毛處小。二文影畧。餘九可知。但第五偈。

卽前所脫

佛以神通無限力

廣演名號等衆生

隨其所樂普使聞

如是雲音能悟解

無量無邊國土衆

佛能令入一毛孔

如來安坐彼會中

此燄口龍之所見

一切衆生瞋恚心

纏蓋愚癡深若海

如來慈愍皆除滅

燄龍觀此能明見

一切衆生福德力

佛毛孔中皆顯現

現已令歸大福海

此高雲幢之所觀

佛身毛孔發智光

其光處處演妙音

衆生聞者除憂畏

德叉迦龍悟斯道

三世一切諸如來

國土莊嚴劫次第

如是皆於佛身現

廣步見此神通力

我觀如來徃昔行

供養一切諸佛海

於彼咸增喜樂心

此速疾龍之所入

佛以方便隨類音

爲衆說法令歡喜

其音清雅衆所悅

普行聞此心欣悟

衆生逼迫諸有中

業惑漂轉無人救

佛以大悲令解脫

無熱大龍能悟此

○第四夜叉王衆長行十法鈔第四夜叉王下前
之十段長行偈頌委

釋第十一一段去卽摘難釋。此下多不釋。偈。偈有難者。懸引釋於長行之中。講者自對會之。

復次毗沙門夜叉王。得以無邊方便救護惡衆生解脫門。自在音夜叉王。得普觀察衆生方便救護解脫門。嚴持器仗夜叉王。得能資益一切甚羸惡衆生解脫門。大智慧夜叉王。得稱揚一切聖功德海解脫門。燄眼主夜叉王。得普觀察一切衆生大悲智解脫門。金剛眼夜叉王。得種種方便利益安樂一切衆生解脫門。勇健臂夜叉王。得普入一切諸法義解脫門。勇敵大軍夜叉王。得守護一切衆生。令住正道無空過者。解脫門。富財夜叉王。得增長一切衆生福德。聚令

恒受快樂解脫門。力壞高山夜叉王。得隨順憶念出生佛力智光明解脫門。

〔疏〕初一卽北方天王。得以無邊等者。謂善者自樂不待加哀。惡者必苦。心則偏重。巧救多門。故云無邊。又此天能伏惡鬼。令不犯衆生。是救護也。二智觀悲救。救苦護善。不滯空有。故云方便。三惡業障重。名甚羸惡。又羸無善力。謂一闡提。惡卽弊惡。謗方等經者。明示妙理。是謂資益。四做佛歎佛得名聞果。五悲智二照。合爲一心。與法身俱。故恆觀察。六妙音說法。利益多端。唯應度者。聲暨能益。七教

廣理深。一句能演。卽是普入八令物離邪則能任正。爲守護矣。然任正道者。則不分別是邪。是正云不思議。九集福德因。受快樂果。由身智光得增長也。十念佛修因。生十力果。天未證極。故云隨順爾時多聞大夜叉王。承佛威力。普觀一切夜叉衆會而說頌言

〔疏〕偈中亦十。文顯可知

衆生罪惡深可怖

於百千劫不見佛

漂流生死受衆苦

爲救是等佛興世

如來救護諸世間

悉現一切衆生前

息彼畏塗輪轉苦

如是法門音王入

衆生業業爲重障

佛示妙理令開解

譬以明燈照世間

此法嚴仗能觀見

佛昔劫海修諸行

稱讚十方一切佛

故有高遠大名聞

此智慧王之所了

智慧如空無有邊

法身廣大不思議

是故十方皆出現

燄目於此能觀察

一切趣中演妙音

說法利益諸羣生

其聲所暨衆苦滅

入此方便金剛眼

一切甚深廣大義

如來一句能演說

如是教理等世間

勇健慧王之所悟

一切衆生住邪道

佛示正道不思議

普使世間成法器

此勇敵軍能悟解

世間所有眾福業

一切皆由佛光照

佛智慧海難測量

如是富財之解脫

憶念往劫無央數

佛於是中修十力

能令諸力皆圓滿

此高幢王所了知

○第五摩睺羅伽王

復次善慧摩睺羅伽王得以一切神通方便令衆生
集功德解脫門淨威音摩睺羅伽王得使一切衆生

除煩惱得清涼悅樂解脫門。勝慧莊嚴髻摩睺羅伽
王得普使一切善不善思覺衆生入清淨法解脫門。
妙目王摩睺羅伽王得了達一切無所著福德自在
平等相解脫門。燈幢摩睺羅伽王得開示一切衆生
令離黑暗怖畏道解脫門。最勝光明幢摩睺羅伽王
得了知一切佛功德生歡喜解脫門。師子臆摩睺羅
伽王得勇猛力爲一切衆生救護主解脫門。衆妙莊
嚴音摩睺羅伽王得令一切衆生隨憶念生無邊喜
樂解脫門。須彌臆摩睺羅伽王得於一切所緣決定
不動到彼岸滿足解脫門。可愛樂光明摩睺羅伽王。

得爲一切不平等衆生開示平等道解脫門

〔疏〕一普現威光。名爲神通。不動性淨。示涅槃因。故云方便。依因集德。必得無依涅槃。二除惑契寂。是清淨因。清涼悅樂。是涅槃果。三善者善之。不善者佛示善之。善覺亦亡。乃入本淨。四福非福相。染不可著。非福現福。名自在相。佛佛無二。是平等相。五無智黑因。如燈開示。怖畏苦果。如幢爲歸。六以知佛德同空。齊已一性。故歡喜也。七見理決斷。聞深不怖。聞淺不疑。聞非深非淺。意而有勇。八風不傾。爲勇猛力。旣以自正。必能正他。爲救護主。

鈔聞深不怖等

者。大分深義。所謂空也。聞說於空。謂同斷滅。故令人怖。故大品云。既非先有。亦非後無。自性常空。勿生驚怖。聞淺不疑者。淺謂涉事。方便多門。則令疑惑。今知隨宜。何所疑耶。聞非深非淺。謂無所據。使身心茫然。知非深為妙。有非淺為真空。離身心相。方為勇猛。可造斯境。又此三句。亦即三觀。初空。次假。後中道。三句。八往修喜。因故見念皆喜。九見理智成。則緣不動。智為行本。諸度悉圓。亦猶海納百川。更不流矣。十開生等理。示佛等應。破情不等。令悟性等。為平等道。

爾時善慧威光摩睺羅伽王。承佛威力。普觀一切摩睺羅伽衆。而說頌言。

〔疏〕十偈如次。文顯可知。

汝觀如來性清淨

普現威光利羣品

示甘露道使清涼

衆苦永滅無所依

一切衆生居有海

諸惡業惑自纏覆

示彼所行寂靜法

離塵威音能善了

佛智無等叵思議

知衆生心無不盡

爲彼闡明清淨法

如是嚴髻心能悟

無量諸佛現世間

普爲衆生作福田

福海廣大深難測

妙目大王能悉見

一切衆生憂畏苦

佛普現前而救護

法界虛空靡不周

此是燈幢所行境

佛一毛孔諸功德

世間共度不能了

無邊無盡同虛空

如是廣大光幢見

如來通達一切法

於彼法性皆明照

如須彌山不傾動

入此法門師子臆

佛於往昔廣大劫

集歡喜海深無盡

是故見者靡不欣

此法嚴音之所入

了知法界無形相

波羅蜜海悉圓滿

大光普救諸衆生

山臆能知此方便

汝觀如來自在力

十方降現罔不均

一切衆生成照悟

此妙光明能善入

○第六緊那羅王十法

復次善慧光明天緊那羅王得普生一切喜樂業解脫門。妙華幢緊那羅王得能生無上法喜令一切受安樂解脫門。種種莊嚴緊那羅王得一切功德滿足廣大清淨信解藏解脫門。悅意吼聲緊那羅王得恒出一切悅意聲令聞者離憂怖解脫門。寶樹光明緊那羅王得大悲安立一切衆生令覺悟所緣解脫門。普樂見緊那羅王得示現一切妙色身解脫門。最勝光莊嚴緊那羅王得了知一切殊勝莊嚴果所從生業解脫門。微妙華幢緊那羅王得善觀察一切世間

業所生報解脫門。動地力緊那羅王得恒起一切利
益眾生事解脫門。威猛王緊那羅王得善知一切緊
那羅心巧攝御解脫門。

〔疏〕一世喜樂業。皆因佛生。二聞深適神。故法喜無
上。終得涅槃無盡安樂。三佛德深廣。信亦包含。四
音演真法。令聞故妄憂除而意悅。五達境唯心而
本空。則安立眾生於覺悟。六難遇益生。所以示現。
相嚴常住。名爲妙色。七大智普慈。是二嚴果。一切
智因。是能生業。八業細難窮。自觀示物。九神通益
物。無間稱恆。十知機巧化。謂攝心正智。御心如境。

爾時善慧光明天緊那羅王承佛威力普觀一切緊那羅衆而說頌言

〔疏〕十頌次第文並可知

世間所有安樂事 一切皆由見佛興

導師利益諸衆生 普作救護歸依處

出生一切諸喜樂 世間咸得無有盡

能令見者不唐捐 此是華幢之所悟

佛功德海無有盡 求其邊際不可得

光明普照於十方 此莊嚴王之解脫

如來大音常演暢 開示離憂真實法

衆生聞者咸欣悅

如是吼聲能信受

我觀如來自在力

皆由往昔所修行

大悲救物令清淨

此寶樹王能悟入

如來難可得見聞

衆生億劫時乃遇

衆相爲嚴悉具足

此樂見王之所覩

汝觀如來大智慧

普應羣生心所欲

一切智道靡不宣

最勝莊嚴此能了

業海廣大不思議

衆生苦樂皆從起

如是一切能開示

此華幢王所了知

諸佛神通無間歇

十方大地恒震動

一切衆生莫能知

此廣大力恒明見

處於衆會現神通

放大光明令覺悟

顯示一切如來境

此威猛主能觀察

○第七迦樓羅王

復次大速疾力迦樓羅王得無著無礙眼普觀察衆
生界解脫門不可壞寶髻迦樓羅王得普安住法界
教化衆生解脫門清淨速疾迦樓羅王得普成就波
羅蜜精進力解脫門不退心莊嚴迦樓羅王得勇猛
力入如來境界解脫門大海處攝持力迦樓羅王得
能竭衆生煩惱海解脫門堅法淨光迦樓羅王得成

就無邊衆生差別智解脫門。妙嚴冠髻迦樓羅王。得莊嚴佛法城解脫門。普捷示現迦樓羅王。得成就不可壞平等力解脫門。普觀海迦樓羅王。得了知一切衆生身而爲現形解脫門。龍音大目精迦樓羅王。得普入一切衆生歿生。行智解脫門。

疏依賢首靜法。皆云準頌。長行脫第五執持王。一智無著故。見無礙。悲普觀。故通悉調。二徧坐覺樹。名住法界。現通說法。名爲教化。三進策諸度。往修。故成四境界。如偈文。絕思則入。方爲勇猛。五諸本多脫。遇本有文云。大海處攝持力。迦樓羅王。得能。

竭衆生煩惱海解脫門。多是古疏本脫。今依有本。然偈約能竭。說佛福智。六衆生無邊。故成就智多。七城有三義。一防外敵。二養人衆。三開門引攝。今言法城。通教理。行果。行契理教。則無不俱嚴。故各有三義。謂了心城之性空。則衆惑不入。見恆沙性德。則萬行爰增。道無不通。則自他引攝。鈔各有三義。下別釋。教理行果。皆有防外敵等三。而四法爲二。以理行合釋。非理不顯行。非行不顯理。故便能契果。絕百非。以成解脫。養衆德。以全法身。開般若。而無不通矣。方顯教城無非。養所詮旨。句句通神。有斯多義。故偈云。廣大叵窮。重重四門。故無數量。究

竟能闡唯我世尊。有斯多義下。二會釋偈文。重重四門者。且第一重。卽是四句。謂一有門。二空門。三亦空。亦有門。四非空。非有門。天台以斯歷於四教。則有四箇四門。畧如前玄談中辨。今且於一重四句中。更有四重四門。然八法身執著成見。取成四謗。得意爲門。今取門義。八法身無相。故不可壞。體卽真如。凡聖平等。無分別智。安住證會。名成就力。九現同類形。方便調伏。十衆生歿生。皆由行業。佛生灰智。方能普入。

爾時大速疾力迦樓羅王。承佛威力。普觀一切迦樓羅衆。而說頌言。

疏頌文如次配釋。可知
佛眼廣大無邊際
普見十方諸國土

其中衆生不可量

現大神通悉調伏

佛神通力無所礙

徧坐十方覺樹下

演法如雲悉充滿

寶髻聽聞心不逆

佛於往昔修諸行

普淨廣大波羅密

供養一切諸如來

此速疾王深信解

如來一一毛孔中

一念普現無邊行

如是難思佛境界

不退莊嚴悉明覩

佛行廣大不思議

一切衆生莫能測

導師功德智慧海

此執持王所行處

疏但第五偈。或有前脫。故畧釋之初二句。甚深廣

大。次句。福智相嚴。行通因果。因深果遠。已不思議。復有一行。是如來行。所謂大乘大般涅槃。則行爲果。果皆絕言道。佛行如出現品。

如來無量智慧光

能滅衆生癡惑網

一切世間咸救護

此是堅法所持說

法城廣大不可窮

其門種種無數量

如來處世大開闡

此妙冠髻能明入

一切諸佛一法身

真如平等無分別

佛以此力常安住

普捷現王斯具演

佛昔諸有攝衆生

普放光明徧世間

種種方便示調伏

此勝法門觀海悟

佛觀一切諸國土

悉依業海而安住

普雨法雨於其中

龍音解脫能如是

○第八阿修羅王十法

復次羅睺阿修羅王得現爲大會尊勝主解脫門毗
摩質多羅阿修羅王得示現無量劫解脫門巧幻術
阿修羅王得消滅一切衆生苦令清淨解脫門大眷
屬阿修羅王得修一切苦行自莊嚴解脫門婆稚阿
脩羅王得震動十方無邊境界解脫門徧照阿修羅
王得種種方便安立一切衆生解脫門堅固行妙莊

嚴阿脩羅王得普集不可壞善根淨諸染著解脫門。
廣大因慧阿脩羅王得大悲力無疑惑主解脫門。現
勝德阿脩羅王得普令見佛承事供養修諸善根解
脫門。善音阿脩羅王得普入一切趣決定平等行解
脫門。

疏一修羅尊勝等須彌之高。如來威光蔽十方大
衆。衆生各見真勝王也。二彼能以一絲作種種事。
令一刹那現於多劫調生等事。三以多法門入佛
境界則苦滅心淨。種種法門亦如幻也。下云苦末
羅。卽巧幻梵音。四多劫多苦爲物非已。如尸毘救

鳩。薩埵投崖。已是丈夫最勝嚴飾。况終尅寂智萬
德以嚴。翻顯無利勤苦。誠爲可醜。旣爲物而行。故
有大眷屬。五以大幻通力。動刹悟機。不怖衆生。斯
爲大力。大力婆稚。華梵異耳。六開種種權門。安衆
生於一極之樂。權爲入大之本故。皆佛智因。權實
不迷。斯爲徧照。七萬善順理。普不可壞。斯解脫處。
何染不亡。功歸正覺。故偈云。佛力如是修者。堅固
妙嚴。八悲用智。故普令無疑。王斯事者。廣大因慧。
九供事修善。有勝德故。十普入諸趣。明處無不徧。
偈云。三世時無不均。同有佛性。名爲決定。具上三

義平等行焉。不宣實義非善音也。此上一段及後
夜神皆結歸名。上下例然。恐繁不釋。

爾時羅睺阿脩羅王承佛威力。普觀一切阿脩羅衆
而說頌言

疏頌文如次可知。

十方所有廣大衆

佛在其中最殊特

光明徧照等虛空

普現一切衆生前

百千萬劫諸佛土

一剎那中悉明現

舒光化物靡不周

如是毗摩深讚喜

如來境界無與等

種種法門常利益

衆生有苦皆令滅

苦末羅王此能見

無量劫中修苦行

利益衆生淨世間

由是牟尼智普成

大眷屬王斯見佛

無礙無等大神通

徧動十方一切刹

不使衆生有驚怖

大力於此能明了

佛出於世救衆生

一切智道咸開示

悉令捨苦得安樂

此義徧照所弘闡

世間所有衆福海

佛力能生普令淨

佛能開示解脫處

堅行莊嚴入此門

佛大悲身無與等

周行無礙悉令見

猶如影像現世間

因慧能宣此功德

希有無等大神通

處處現身充法界

各在菩提樹下坐

此義勝德能宣說

如來徃修三世行

諸趣輪迴靡不經

脫衆生苦無有餘

此妙音王所稱讚

已上八部四王衆竟

○自下第二諸神衆有十九衆。今初三晝神十法。復次示現宮殿主晝神。得普入一切世間解脫門。發起慧香主晝神。得普觀察一切衆生皆利益。令歡喜滿足。解脫門樂勝莊嚴主晝神。得能放無邊可愛樂。

法光明解脫門。華香妙光主晝神。得開發無邊衆生。
清淨信解心解脫門。普集妙藥主晝神。得積集莊嚴。
普光明力解脫門。樂作喜目主晝神。得普開悟一切。
苦樂衆生皆令得法樂解脫門。觀方普現主晝神。得
十方法界差別身解脫門。大悲威力主晝神。得救護
一切衆生令安樂解脫門。善根光照主晝神。得普生
喜足功德力解脫門。妙華瓔珞主晝神。得聲稱普聞。
衆生見者皆獲益解脫門。

〔疏〕一智了物心。如空入色。光照身器。如日合空。身
徧器中。如像在鏡。世間主力能攝此身。此身之性

等世間故皆入觀機故名普入所入之處卽爲宮
殿。鈔智了物心如空入色者。取下偈意。偈中如空
是喻光明之言。舍於法喻。餘皆是法。法喻相對
畧有三入。一以初句佛智爲能入。第二三句衆生心
行爲所入。入者了達義。故八十經云。佛智廣大同
虛空。普徧一切衆生心。悉了世間諸妄想。不起種
種異分別。此卽智了物心。而云如空入色者。出現
品云。譬如虛空徧至一切色非色處。二言光照身
器如日合空者。卽以第二句光明爲能入。第四句
爲所入。一切世間卽衆生世間。及器世間。故云光
照身器。卽取上空喻爲所入。取光明上法喻。皆爲
能入。光通二種。身光照事。智光雙照事理。三身徧
器中。如像在鏡者。卽唯取第四句。自有能所。則無
不入。言通三種。入一光入。二智入。如上已說。三身
入。但言無不入。不揀身故。而言如像在鏡者。將上
如空。普徧喻此。亦齊今旁。出一喻。以喻身入。質來
對鏡。鏡中見像。像是質像。機感對利。利中見佛。佛
是心佛。世間主。力下。上是佛德。今攝就畫神。故云
能攝此身。此身之性等世間故者。彰入所以智身

色身皆等。世間論云。智性色性。皆相卽故。皆入觀
機。彰入之意。並釋普字。結歸長行。所入之處下。結
歸神名。以難見。故偏結。○七。隨緣。二。義圓。稱機。故
非有之法。身等。至第五經當釋。二。義圓。稱機。故
滿心成益。三。身法。二。光。皆可。愛樂。四。法雨。潤種。已
含實者。解開。善未芽者。信發。五。無法不悟。名。普明
力。曠劫修集。成智莊嚴。六。方便開示。世樂亦苦。令
其悟入。見理法樂。如歡喜地也。七。如來身雲。就體
則非有無。約機。則差別徧於十方。不可謂之無。約
佛。則稱真法界。不可謂之有。此則隨緣非有之法
身。恆不異事。而顯現。以化寂滅。非無之衆生。恆不
異真。而成立。卽無差別之差別也。八。處危者。護之

令安。有苦者。救之令樂。九衆生暗於多欲。故沉淪長夜。以法開曉。喜足爲先。喜足智俱。是功德力。能令離苦得安樂故。十有覺德行。故名稱普聞。旣福廣名高。故不虛其益。

爾時示現宮殿。王晝神。承佛威力。普觀一切王晝神衆。而說頌言。

〔疏〕偈文可知

佛智如空無有盡

光明照曜徧十方

衆生心行悉了知

一切世間無不入

知諸衆生心所樂

如應爲說衆法海

句義廣大各不同

具足慧神能悉見

佛放光明照世間

見聞歡喜不唐捐

示其深廣寂滅處

此樂莊嚴心悟解

佛雨法雨無邊量

能令見者大歡喜

最勝善根從此生

如是妙光心所悟

普入法門開悟力

曠劫修治悉清淨

如是皆爲攝衆生

此妙藥神之所了

種種方便化羣生

若見若聞咸受益

皆令踊躍大歡喜

妙眼晝神如是見

十力應現徧世間

十方法界悉無餘

體性非無亦非有

此觀方神之所入

衆生流轉險難中

如來哀愍出世間

悉令除滅一切苦

此解脫門悲力住

衆生暗覆淪永夕

佛爲說法大開曉

皆使得樂除衆苦

大善光神入此門

如來福量同虛空

世間衆福悉從生

凡有所作無空過

如是解脫華纓得

○第二主夜神十法。初七夜神。是善財十地善友。

見解深廣。彌顯衆海。法門難思。

復次普德淨光主夜神。得寂靜禪定樂。大勇健解脫。

門喜眼觀世王夜神得廣大清淨可愛樂功德相解
脫門護世精氣王夜神得普現世間調伏衆生解脫
門寂靜海音王夜神得積集廣大歡喜心解脫門普
現吉祥王夜神得甚深自在悅意言音解脫門普發
樹華王夜神得光明滿足廣大歡喜藏解脫門平等
護育王夜神得開悟衆生令成熟善根解脫門遊戲
快樂王夜神得救護衆生無邊慈解脫門諸根常喜
王夜神得普現莊嚴大悲門解脫門示現淨福王夜
神得普使一切衆生所樂滿足解脫門

〔疏〕一普德淨光卽善財離垢地善友彼名全同法

門名寂靜禪定樂普游步。普游步言卽大勇健也。寂靜禪定樂卽是定體。現法樂在。故名爲樂。大勇健者卽是定用。健則堪能。勇則無畏。謂見佛靜機游戲神通。故名勇健。亦游步也。勇健廣大。故稱普德。無惑智俱。可謂淨光。一卽發光地。善友彼名喜目。觀察衆生。解脫名大勢力。普喜幢。謂此解脫德無不備。化無不周。名大勢力。卽今廣大身。惑俱淨。無不樂見。故云普喜。悲爲德相。卽幢義也。觀察普喜。名爲喜目。三卽燄慧地。善友彼名普救衆生妙德。護世精氣。方是救生。由護生故。顯德之妙也。法

門全同。次第又當。謂感必現前。調令清淨故。四卽
難勝地善友。彼名寂靜音海。法門名念念出生。廣
大喜莊嚴。念念出生。卽積集義。見佛利生。故生大
喜。莊嚴二義。一見佛修歡喜因。嚴樂見果故。二積
集此喜。神自莊嚴。由定發音。名寂靜音。深廣如海
五卽現前地善友。彼云守護一切城。增長威力。偈
云尸利。以梵音含於二義。一云吉祥。二翻爲守。故
下譯跋陀室利。以爲賢首。又以首字。音同義別。彼
爲頭首。法界品中。乃爲守護。皆譯者方言少融耳。
若以義會。增長威力。卽是普現吉祥。正當次第。法

門又同。彼云甚深自在。妙音解脫。妙音故悅意。悅則意淨。卽寂能演。故名自在。六卽遠行地善友。彼云開敷一切樹華。一切開敷。卽普發也。法門。彼云菩薩出生廣大喜光明。文少倒畧耳。舊經云。菩薩無量歡喜知足光明。知足滿足。文相近也。謂能知如來巧智示法。大福威光。故曰光明。佛以福智滿足物心。則含喜名藏。七卽不動地善友。彼名大願。精進力救護一切衆生。法門名教化衆生。令生善根。教化開悟。文異義同。令生成熟。始終異耳。謂現通示相。皆爲調化。一切善根。皆令生長。不等護育。

卽救護一切。精進大願。故能爲之。今文畧耳。八念
念久修。恆徧救護。是無邊慈也。此與善財歡喜地
善友似同。而文多異。又非其次。故但直釋。九於三
毒難壞衆生。以大悲門現莊嚴身故。石室畱影。毒
龍心革。况現身耶。鈔石室畱影。毒龍心革者。革變
也。卽觀佛三昧。海經彼事極長。
今當畧意。卽第七經。佛告阿難云。如來到那乾訶
羅國。古仙山。蒼葛華林。毒龍池側。青蓮華泉。北羅
刹穴中。阿那斯山。南爾時彼穴。有五羅刹。化作龍
女。與毒龍通。龍復降。毒羅刹亂行。饑饉疾疫。已歷
四年。時王驚懼。禱祀神祇。於事無益。下取意引。有
一梵志。讚佛功德。彼王焚香遙請。如來。如來受那
乾訶羅王弗巴。浮提請。廣現神變。羅刹毒龍。旣受
化已。爾時龍王長跪合掌。勸請世尊。唯願如來。常
住此間。佛若不在此。我發惡心。無由得成。無上菩提
世尊不離龍窟。復受王請。入城教化。遊行往昔行

苦薩道處諸龍皆從聞佛欲還復啼哭雨淚白佛
言世尊請佛常住云何捨我我不見佛當作惡事
墜墮惡道爾時世尊安慰龍王我受汝請坐汝窟
中千五百歲釋迦文佛躡身入石猶如明鏡見人
面像諸龍皆見佛在石內影現於外爾時諸龍合
掌歡喜不出其池常見佛日爾時世尊結跏趺坐
在石壁內衆生見時遠望則見近則不現諸天百
千供養佛影影亦說法時梵天王合掌恭敬以偈
頌曰如來處石窟躡身入石裏如日無障礙金光
相具足我今頭面禮牟尼救世尊經文甚廣復令
衆生觀於佛座見丈六像坐於草座作一石窟高
丈八尺深二十四步青白石相又想此窟成七寶
窟復見佛像躡入石窟等廣弘明集說遠公有石
影讚說處所與經全同云在西域那伽訶羅國南
山古仙石室中度流沙逕道去此一萬五千八百
五十里感世之應備於別傳西域記第八亦說遠
公序云昔遇西域沙門輒餐遊方之說知有佛影
而傳者尙未曉然及在此山值爾賓禪師南國律
學道上與昔聞既同竝是其人遊歷所經因其詳
問乃圖之爲銘曰廓矣大象理玄無名體神入化

落影離形。迴輝層巖。凝映虛亭。在陰不昧。處暗逾明。婉出蟬蛻。朝宗百靈。應不同方。迹絕兩冥。其一一。茫茫荒宇。靡勸靡獎。淡虛寫容。拂空傳像。相具體微。中資自朗。白毫吐曜。昏夜中爽。感誠乃應。扣機發響。留音停岫。津悟冥賞。撫之有會。功弗由曩。十其二。餘如廣弘明集。厨賓禪師。卽耶舍三藏。

本為衆生。故成自德。令他樂滿。

爾時普德淨光王夜神。承佛威力。徧觀一切王夜神衆而說頌言。

汝等應觀佛所行

廣大寂靜虛空相

欲海無涯悉治淨

離垢端嚴照十方

疏偈中十偈如次。初中。初句解脫之力能觀。次句卽寂靜樂神。以此定觀佛此體。故下經云。皆見三

世佛而無取著。以知如來無相性。相本空故。故云
寂靜虛空相也。次句卽大勇健。準下經。則自他兼
淨也。次句定果也。上約佛說。若約天說。卽四句皆
是定用。以任此解脫。能見佛體用因果故。

一切世間咸樂見

無量劫海時一遇

大悲念物靡不周

此解脫門觀世觀

導師救護諸世間

衆生悉見在其前

能令諸趣皆清淨

如是護世能觀察

〔疏〕二二三可知。

佛昔修治歡喜海

廣大無邊不可測

是故見者咸欣樂 此是寂音之所了

〔疏〕四中稱理徧喜。爲廣大無邊。縱內心不搖。而外現威怒。更深難測。

如來境界不可量 寂而能演徧十方

普使衆生意清淨 尸利夜神聞踊悅

〔疏〕五以寂故能徧。

佛於無福衆生中 大福莊嚴甚威曜

示彼離塵寂滅法 普發華神悟斯道

〔疏〕六以衆生本來自盡。故是寂滅。是以智窮妄本。理無不顯。安徹真源。惑無不盡。喜方滿足。故法門。

名出生廣大喜也

十方普現大神通

一切眾生悉調伏

種種色相皆令見

此護育神之所觀

如來往昔念念中

悉淨方便慈悲海

救護世間無不徧

此福樂神之解脫

眾生愚癡常亂濁

其心堅毒甚可畏

如來慈愍爲出興

此滅冤神能悟喜

佛昔修行爲眾生

一切願欲皆令滿

由是具成功德相

此現福神之所入

〔疏〕七八九十偈可知

○第三王方神十法

復次徧住一切王方神。得普救護。力解脫門。普現光明。王方神。得成辦化一切衆生。神通業解脫門。光行莊嚴。王方神。得破一切暗障。生喜樂。大光明解脫門。局行不礙。王方神。得普現一切處。不唐勞。解脫門。永斷迷惑。王方神。得示現等一切衆生。數名號。發生功德。解脫門。徧遊淨空。王方神。得恒發妙音。令聽者皆歡喜。解脫門。雲幢大音。王方神。得如龍普雨。令衆生歡喜。解脫門。髻目無亂。王方神。得示現一切衆生。業無差別。自在力。解脫門。普觀世業。王方神。得觀察一

切趣生中種種業解脫門。周徧遊覽主方神。得所作
事皆究竟。生一切衆生歡喜解脫門。

〔疏〕一現身說法。令悟得果。皆救護力。二神通示相。
是能成辦業。衆生出苦。是所成辦業。三法光破闇。
闡斷智生智。與法喜俱生。斷以寂滅爲樂。四普現
說法。聞必惑滅。故不唐勞。五聖人無名。隨物立名。
貴在生德。及滅惑耳。六七可知。八業同性空。並不
失報。俱無差異。性相無礙。爲自在力。說能感報。令
除惡業。說業性空。善業亦亡。九前約說業性相。令
物絕業。此約知業差別。擬隨機化。十世人靡不有。

初鮮克有終。今聖人有志有能。故所作究竟。世人
以人隨欲。不能兼亡。今有慈有愍。故令物喜。謂十
波羅密。無不究竟。四無量心。令物歡喜。鈔世人以
人隨欲者
書云。小人以人從欲。君子以欲從人。言不能兼亡
者。亡無也。而亡字有心。則自他相忘。不恃己功也。
今云兼於無道之人耳。

爾時徧住一切主方神。承佛威力。普觀一切主方神
衆而說頌言。

疏頌中次第配釋。可知

如來自在出世間 教化一切諸羣生

普示法門令悟入 悉使當成無上智

神通無量等衆生

隨其所樂示諸相

見者皆蒙出離苦

此現光神解脫力

佛於暗障衆生海

爲現法炬大光明

其光普照無不見

此行莊嚴之解脫

具足世間種種音

普轉法輪無不解

衆生聽者煩惱滅

此徧住神之所悟

一切世間所有名

佛名等彼而出生

悉使衆生離癡惑

此斷迷神所行處

若有衆生至佛前

得聞如來美妙音

莫不心生大歡喜

徧遊虛空悟斯法

佛於一一剎那中

普雨無邊大法雨

悉使衆生煩惱滅

此雲幢神所了知

一切世間諸業海

佛昔開示等無異

普使衆生除業惑

此髻目神之所了

一切智地無有邊

一切衆生種種心

如來照見悉明了

此廣大門觀世入

佛於往昔修諸行

無量諸度悉圓滿

大慈哀愍利衆生

此徧遊神之解脫

○第四主空神長行十法

復次淨光普照主空神得普知諸趣一切衆生心解

脫門。普遊深廣。主空神。得普入法界。解脫門。生吉祥
風。主空神。得了達無邊境界。身相解脫門。離障安住
主空神。得能除一切衆生業惑障。解脫門。廣步妙髻
主空神。得普觀察思惟廣大。行海解脫門。無礙光燄
主空神。得大悲光普救護一切衆生。厄難解脫門。無
礙勝力。主空神。得普入一切無所著福德力。解脫門。
離垢光明。主空神。得能令一切衆生心離諸蓋。清淨
解脫門。深遠妙音。主空神。得普見十方智光明。解脫
門。光徧十方。主空神。得不動本處而普現世間。解脫

門

〔疏〕一智慧造理。則十眼廣照。日月合空。則萬象歷然。二身智。二光徧入法界。三佛身如空。是無邊境。無生無染。爲吉祥風。四廣說聖道。則離三障。安住二空。五上求下化。名廣大行。爲安衆生。如妙髻焉。六沉生處之厄難。悲智光以濟之。七不礙福智相。導。是謂勝力。八惑由智遣。九妙音善說。十不壞本處。而稱周十方。

爾時淨光普照。主空神。承佛威力。普觀一切。主空神衆。而說頌言。

〔疏〕偈中十頌如次。

如來廣大目 清淨如虛空 普見諸衆生

一切悉明了 佛身大光明 徧照於十方

處處現前住 普遊觀此道 佛身如虛空

無生無所取 無得無自性 吉祥風所見

〔疏〕三中。空有四義。含於五法。一。離能取生。卽絕妄

想。二。離所取相。無相無名。三。境無自性。卽是如如。

四。心無所得。是爲正智。迷如以成名相。妄想是生。

悟名相之本如。輒翻成智。如外無智。智體卽如。此

二。猶空寂照無礙。如斯見佛。是曰吉祥。鈔。空有四

法者。四義卽無生等。五法卽名等。今當先釋五法。後消疏文。五法經論皆具。且依楞伽列次者。則名

相妄。想正。智如。如以。為其次。若。於伽七十一云。一
 相。二名。三分。別。四真。如。五正。智。分別。即妄。想。異。名。
 相。謂言。談安。足。事。處。名。即於。相。所。有。增。語。分。別。謂。
 三。界。行。中。所。有。心。心。所。真。如。謂。無。為。法。無。我。所。顯。
 聖。智。所。行。非。一。切。言。談。安。足。事。處。正。智。畧。有。二。種。
 一。唯。出。世。間。正。智。二。世。間。出。世。間。正。智。釋。曰。上。即。
 根。本。下。即。後。得。已。知。五。法。名。相。差。別。今。當。消。疏。疏。
 中。先。以。五。法。屬。文。後。迷。如。下。辨。因。起。融。攝。言。迷。如。
 以。成。名。相。則。妄。想。是。生。者。此。顯。迷。時。唯。有。三。法。一。
 名。二。相。三。妄。想。故。此。五。法。通。該。一。切。而。不。必。同。時。
 謂。妄。想。正。智。此。必。不。並。故。今。有。妄。想。決。無。正。智。其。
 如。如。名。相。則。有。隱。顯。此。中。迷。故。如。如。則。隱。名。相。則。
 顯。次。云。悟。名。相。之。本。如。執。翻。成。智。者。此。顯。悟。時。但。
 有。其。二。一。正。智。二。如。如。既。有。正。智。決。無。妄。想。了。得。
 如。如。名。相。則。隱。雖。不。壞。相。舉。體。即。空。理。奪。於。事。無。
 不。蕩。盡。是。故。空。中。無。色。等。法。故。楞。伽。云。謂。了。名。相。
 及。與。妄。想。體。不。可。得。名。為。正。智。如。如。即。是。名。相。妄。
 想。本。自。不。生。釋。云。名。相。不。生。則。境。如。如。矣。妄。想。不。生。
 則。心。如。矣。了。心。境。如。是。為。正。智。故。唯。正。智。及。如。如。
 存。次。云。如。外。無。智。智。體。即。如。者。復。融。上。二。以。為。一。

味。如外無智。卽以如攝智。智體卽如。是以智攝如。合爲一味。故下經云。無有智外如。爲智所入。亦無如外智。能證於如。卽斯義也。故疏結云。此一猶空寂。照無礙。寂卽是如。照卽正智。如日合空。雖有二事。一相難分。

如來無量劫 廣說諸聖道 普滅衆生障

圓光悟此門

疏四。中。長行及列。竝名安任。今云圓光。圓光表智。安任表定。二事相資。前後互舉。竝能滅障。於理無

違

我觀佛往昔 所集菩提行 悉爲安世間
妙髻行斯境 一切衆生界 流轉生死海

佛放滅苦光 無礙神能見

疏六中。生灰海者。瑜伽七十二云。五法相似。生灰。得大海名。一處無邊相似故。二甚淡故。三難度故。四不可飲故。五大寶所依故。釋曰。由前四義。衆生流轉。由第五義。菩薩入之。且約分喻。第九十云。由三相故。不同水海。一自性不同。分謂水海。唯色一分。二淪沒不同。唯人畜故。唯沒身故。三超度不同。未離欲者。亦能度故。生灰海。反上可思。○餘四偈。可知。

清淨功德藏 能爲世福田 隨以智開覺

力神於此悟 衆生癡所覆 流轉於險道
佛爲放光明 離垢神能證 智慧無邊際
悉現諸國土 光明照世間 妙音斯見佛
佛爲度衆生 修行徧十方 如是大願心
普現能觀察

○第五王風神十法

復次無礙光明王風神。得普入佛法及一切世間解脫門。普現勇業王風神。得無量國土佛出現咸廣大供養解脫門。飄擊雲幢王風神。得以香風普滅一切衆生病解脫門。淨光莊嚴王風神。得普生一切衆生

善根。令摧滅重障。山解脫門。力能竭水。主風神。得能
破無邊惡魔。衆解脫門。大聲徧吼。主風神。得永滅一
切衆生怖解脫門。樹杪垂髻。主風神。得入一切諸法
實相。辯才海解脫門。普行無礙。主風神。得調伏一切
衆生。方便藏解脫門。種種宮殿。主風神。得入寂靜禪
定。門滅極重愚癡。暗解脫門。大光普照。主風神。得隨
順一切衆生。行無礙力解脫門。

〔疏〕一以方便風。合智日光。智入淡法。而無障礙。身
入世間。而無影像。二菩薩以求菩提之大心。持稱
真之供具。等虛空之廣大。不礙事之繁多。而以全

法之身。一念供無邊之佛。彼風力無不成也。三
 長風忽來。浮雲散滅。慈風起。惑苦病亡。四福智
 莊嚴之風。摧壞如山之障。十力降魔。十軍皆殄。
 獨名竭水者。欲愛為初。初。鈔力降魔。十軍皆殄者。
憂愁軍第二。饑渴軍第三。凌軍第四。睡眠軍第
 五。怖畏軍第六。疑軍第七。含毒軍第八。養軍
 第九。著虛妄名聞。自高軍第十。輕慢於他人。汝等
 軍如是。一切世間人。及諸一切天。無能破之者。我
 以智慧箭。修定智為弓。摧破汝魔軍。如
 坏餅沒水。今以凌欲為水。故偏語之。六毛孔慈
 音。滅除五怖。若百竅異吹。徧吼悅機。七智入實相。
 故妙辨如海。如風擊樹。故能下垂。八調生方便。為
 智所入。故名為藏。九禪定宮殿。必定慧雙游。故能

滅癡闇。約佛。則動寂無二。見必滅癡。十日月明照。
非風不運。智行無礙。方便力焉。

爾時無礙光明王風神。承佛威力。普觀一切王風神
衆而說頌言。

〔疏〕十偈可知。

一切諸佛法甚深

無礙方便普能入

所有世間常出現

無相無形無影像

汝觀如來於往昔

一念供養無邊佛

如是勇猛菩提行

此普現神能悟了

如來救世不思議

所有方便無空過

悉使衆生離諸苦

此雲幢神之解脫

衆生無福受衆苦

重蓋密障常迷覆

一切皆令得解脫

此淨光神所了知

如來廣大神通力

克殄一切魔軍衆

所有調伏諸方便

勇健威力能觀察

佛於毛孔演妙音

其音普徧於世間

一切苦畏皆令息

此徧吼神之所了

佛於一切衆刹海

不思議劫常演說

此如來地妙辯才

樹杪髻神能悟解

佛於一切方便門

智入其中悉無礙

境界無邊無與等

此普行神之解脫

如來境界無有邊

處處方便皆令見

而身寂靜無諸相

種種宮神解脫門

如來劫海修諸行

一切諸力皆成滿

能隨世法應衆生

此普照神之所見

建寧府和樂坊弟子龔覺果仝室謝氏
美娘捐貲刊刻
華嚴經世王妙嚴品疏論纂要第八卷
永遠流通上薦
先考正心妣張氏法名興貞頓破幽關
早超樂土者伏願身安壽永福慧莊嚴
熊羆叶夢麟趾呈祥者
康熙己未年十月朔旦
華藏室謹題

大方廣佛華嚴經疏論纂要卷第八

葉盛陽刊